



Republika e Kosovës
Republika Kosova - Republic of Kosovo

ZYRA E RREGULLATORIT PËR ENERGJI
REGULATORNI URED ZA ENERGIJU
ENERGY REGULATORY OFFICE



Rregulla ZRRE/Nr. 15/2017

RREGULLA PËR VENDOSJEN E TË HYRAVE PËR FURNIZUESIN ME SHËRBIM
UNIVERSAL
(Rregulla për të Hyrat e FSHU)

27 prill 2017

PËRMBAJTJA

KREU I	KUSHTET E PËRGJITHSHME	3
	Neni 1 Qëllimi dhe fushëveprimi	3
	Neni 2 Përkufizimet dhe interpretimet	3
KREU II	E DREJTA PËR SHËRBIM UNIVERSAL	7
	Neni 3 Shërbimi universal	7
	Neni 4 Përcaktimi i çmimit të arsyeshëm	7
	Neni 5 Vlerësimi i konkurrencës në tregun e shitjes me pakicë	8
KREU III	OBLIGIMI I SHËRBIMIT PUBLIK	9
	Neni 6 Vendosja e obligimit të shërbimit publik	9
	Neni 7 Rregullimi i çmimeve për Furnizuesin e Shërbimit Universal	9
KREU IV	TARIFA E SHITJES ME PAKICË PËR KONSUMATORËT E SHËRBIMIT UNIVERSAL	10
	Neni 8 Parimet e përgjithshme	10
	Neni 9 Shqyrtimet e vlerave hyrëse	10
	Neni 10 Përshtatjet e të hyrave të rregulluara	11
	Neni 11 Shqyrtimet e jashtëzakonshme	11
KREU V	VLERAT HYRËSE	12
	Neni 12 Përkufizimi i vlerave hyrëse	12
KREU VI	TË HYRAT E RREGULLUARA TË SHËRBIMIT UNIVERSAL	13
	Neni 13 Parimet e përgjithshme	13
	Neni 14 Kostot e lejuara me pakicë	14
	Neni 15 Kostot e lejuara të kapitalit punues	14
	Neni 16 Kostot e lejuara të borxhit të keq	15
	Neni 17 Kostot e blerjes së energjisë me shumicë	15
	Neni 18 Kostot që barten	16
	Neni 19 Alokimi i kostove	17
KREU VII	METODOLOGJIA PËR STRUKTURËN TARIFORE	18
	Neni 20 Metodologjia për strukturimin e tarifës me pakicë për konsumatorët e shërbimit universal	18
KREU VIII	DISPOZITAT KALIMTARE DHE PËRFUNDIMTARE	19
	Neni 21 Ndryshimi	19
	Neni 22 Interpretimi	19
	Neni 23 Shfuqizimi	19
	Neni 24 Hyrja në fuqi	19
SHTOJCA 1	LLOGARITJA E TË HYRAVE TË RREGULLUARA	20
SHTOJCA 2	PROCESI I SHQYRTIMIT TË VLERAVE HYRËSE	22
SHTOJCA 3	PROCESI I PËRSHTATJEVE VJETORE	24
SHTOJCA 4	PROCESI I SHQYRTIMIT TË JASHTËZAKONSHËM	26
SHTOJCA 5	NGJARJET E JASHTËZAKONSHME	28
SHTOJCA 6	NGJARJET E FORCËS MADHORE	29

Bordi i Zyrës së Rregullatorit për Energji, sipas autoritetit të dhënë me Nenin 9, paragrafi 1, nënparagrafi 1.7, Nenin 26, të Ligjit për Rregullatorin e Energjisë Nr. 05/L-084, dhe Nenit 37 të Ligjit për Energjinë Elektrike Nr.05/L-085, në seancën e mbajtur më 27 prill 2017, miratoi si në vijim:

Rregullën për vendosjen e të hyrave të furnizuesit të shërbimit universal (Rregulla për të Hyrat e FSHU)

KREU I

KUSHTET E PËRGJITHSHME

Neni 1

Qëllimi dhe fushëveprimi

- 1 Kjo rregull përcakton:
 - 1.1 Metodologjinë për vendosjen e tarifës së shitjes me pakicë për konsumatorët e shërbimeve universale që marrin shërbimet nga furnizuesi i shërbimit universal (FSHU) për shitjen me pakicë të energjisë elektrike;
 - 1.2 Procesin për shqyrtimin dhe përshtatjen e tarifës së shitjes me pakicë për konsumatorët e shërbimeve universale; dhe
 - 1.3 Se si Rregullatori mund të imponojë obligimin e shërbimit publik mbi furnizuesin e shërbimit universal për konsumatorëve të cilët gëzojnë të drejten e furnizimit me shërbim universal.

Neni 2

Përkufizimet dhe interpretimet

- 1 Shprehjet e përdorura në këtë rregull kanë këtë kuptim:
 - 1.1 **Furnizuesi i shërbimit universal (FSHU)** – është furnizuesi të cilit i është vendosur një obligim i shërbimit publik nga rregullatori për të siguruar shërbim universal me kushte të rregulluara për konsumatorët familjar dhe jofamiljar që kanë qarkullim vjetor jo më shumë se dhjetë (10) milion euro ose jo më shumë se 50 punëtorë;
 - 1.2 **Të hyra të rregulluara aktuale** - të hyrat që mbulohen nga Furnizuesi i Shërbimit Universal, duke ua ngarkuar tarifën e shitjes me pakicë konsumatorëve të shërbimit universal;

- 1.3 **Përshtatje vjetore** - nënkupton përshtatjet e të hyrave të lejuara dhe tarifës së rregulluar me pakicë, të realizuar në fund të çdo viti relevant;
- 1.4 **Borxhi i keq i lejuar** - e ka kuptimin që i është dhënë në Nenin 16, paragrafi 1;
- 1.5 **Ditë pune** - quhen të gjitha ditët e punës brenda një jave, të përcaktuara sipas ligjeve në Kosovë;
- 1.6 **Kategori e konsumatorëve** - klasifikimi i llojeve të ndryshme të konsumatorëve për qëllime të ngarkimit me tarifën me pakicë. Klasifikimi duhet të ketë parasysh mënyrën e matjes së energjisë aktive dhe kapacitetit, mënyrën e konsumit të energjisë elektrike, ngarkesën e pikut, tensionin e furnizimit dhe karakteristikat e tjera që kanë ndikim në koston e furnizimit;
- 1.7 **Operatori i Sistemit të Shpërndarjes** - personi fizik ose juridik, përgjegjës për operimin, mirëmbajtjen dhe, sipas nevojës, zhvillimin e sistemit të shpërndarjes në një zonë të caktuar, si dhe ku është e mundur interkonektorët e tij me sistemet tjera, si dhe për sigurimin e aftësisë afatgjate të sistemit për të mbuluar kërkesat e arsyeshme për shpërndarjen e energjisë elektrike;
- 1.8 **Tarifat për shfrytëzimin e sistemit të shpërndarjes** - tarifa e rregulluar e ngarkuar nga OSSH për shpërndarjen e energjisë elektrike;
- 1.9 **Jetëgjatësia Ekonomike** - shpërndarjen sistematike të shumës së zhvlerësueshme të një aseti gjatë jetës së tij të dobishme të lejuar nga baza e aseteve të rregulluara;
- 1.10 **Baza e aseteve të rregulluara** - të gjitha asetet e përdorura dhe të dobishme në ofrimin e shërbimeve nga subjekti i rregulluar, përveç aseteve plotësisht të zhvleftësuara;
- 1.11 **EURIBOR** - norma e ofrimit për depozita të euros nga Federata bankare evropiane për periudhë 12-mujore, që paraqitet në faqen e caktuar të shërbimit të Reuters në ora 11:00 (kohë e matur sipas kohës qendrore evropiane) ose, në rast se Reuters nuk vazhdon ta ofrojë këtë informacion, cilido shërbim tjetër për të cilin pajtohen OSD dhe Rregullatori. Për të shmangur dyshimin kjo do të jetë normë vjetore;
- 1.12 **Përshtatje e jashtëzakonshme** - ka kuptimin që i është dhënë në Shtojcën 5;
- 1.13 **Ngjarje e jashtëzakonshme** - ka kuptimin që i është dhënë në Shtojcën 6;
- 1.14 **Shqyrtim i jashtëzakonshëm** - ka kuptimin që i është dhënë në Nenin 11;
- 1.15 **Vendim final** - ka kuptimin që i është dhënë në Shtojcën 3, paragrafi 10;
- 1.16 **Ngjarjet e forcës madhore** - e ka kuptimin që i është dhënë në Shtojcën 7;

- 1.17 **Vlerat hyrëse** - e ka kuptimin që i është dhënë në Nenin 12;
- 1.18 **Shqyrtimi i vlerave hyrëse** - shqyrtimi nga rregullatori për të përcaktuar vlerat hyrëse;
- 1.19 **Taksa për licencë** - shuma për pagesë sipas pasqyrës së taksave, që lëshohet nga rregullatori;
- 1.20 **Pragu i materialitetit** - ka kuptimin që i është dhënë në Shtojcën 5;
- 1.21 **Vlera neto e tanishme** - shuma e zhvlerësimit të rrjedhave të ardhshme të parasë;
- 1.22 **Kostot që barten** - kostot e përcaktuara në pajtim me Nenin 18;
- 1.23 **Propozim** - ka kuptimin që i është dhënë në Shtojcën 3, paragrafi 5;
- 1.24 **Vlerësim i përkohshëm** - ka kuptimin që i është dhënë në Shtojcën 3, paragrafi 8;
- 1.25 **Konsumator i shërbimit universal** - janë të gjithë konsumatorët familjar dhe jofamiljar që kanë qarkullim vjetor jo më shumë së dhjetë (10) milion euro, ose jo më shumë së pesëdhjetë (50) punonjës;
- 1.26 **Vlerësim i konkurrencës në tregun me pakicë** - vlerësimi i efektivitetit të konkurrencës së furnizimit me pakicë të tregut i kryer në pajtim me nenin 5 të kësaj rregulle;
- 1.27 **Tarifë e shitjes me pakicë për konsumatorët e shërbimeve universale** - bashkësia e çmimeve që FSHU ua ngarkon konsumatorëve fundor për ofrimin e shërbimeve standarde, siç përcaktohen nga rregullatori;
- 1.28 **Zyra e Rregullatorit për Energji (Rregullatori)** - është agjenci e pavarur në sektorin e energjisë, e themeluar me Ligjin për Rregullatorin e Energjisë;
- 1.29 **Vit relevant** - periudha prej 12 muajsh të njëpasnjëshëm në mes të përshtatjeve vjetore;
- 1.30 **Marzha me pakicë** - ka kuptimin që i është dhënë në Nenin 17, paragrafi 8;
- 1.31 **Obligime të shërbimit publik** - obligim që i imponohet një ndërmarrjeje të energjisë elektrike sipas ligjit ose sipas një vendimi të aprovuar nga Qeveria ose Zyra e Rregullatorit për Energji varësisht nga fushat e përgjegjësisë se tyre mund të vendosin obligime që mund të lidhet me sigurinë e furnizimit me energji elektrike, rregullshmërinë, kualitetin dhe çmimet e furnizimit, eficientësinë e energjisë, energjinë nga burimet e energjisë së ripërtërishme si dhe mbrojtjen mjedisore dhe klimatike, por që nuk krijon diskriminim dhe nuk dëmton konkurrencën përtej masës së domosdoshme për arritjen e qëllimit për të cilin imponohet shërbimi publik në fjalë;

- 1.32 **Shërbimi universal i furnizimit** - e drejta e konsumatorëve familjarë dhe ndërmarrjeve ekonomike që punësojnë jo më shumë se pesëdhjetë (50) punonjës dhe që kanë qarkullim vjetor jo më shumë se dhjetë (10) milion euro që të furnizohen me energji elektrike të një kualiteti të caktuar me çmim të arsyeshëm, qartësisht të krahasueshëm, transparent dhe jo diskriminues;
- 1.33 **Shërbime standarde** - shërbimet që u ofrohen konsumatorëve për furnizimin me energji elektrike nga FSHU, siç përkufizohen në licencën për furnizim publik dhe kushtet e përgjithshme të furnizimit me energji;
- 1.34 **Raport i ndikimit financiar** - ka kuptimin që i është dhënë në Shtojcën 5;
- 1.35 **Periudhë kalimtare** - e ka kuptimin që i është dhënë në Shtojcën 8;
- 1.36 **Operator i Sistemit të Transmetimit** - personi fizik, ose juridik përgjegjës për operimin, mirëmbajtjen dhe, sipas nevojës, zhvillimin e rrjetit të transmetimit në një zonë të caktuar përfshirë kurdo që kjo është e mundur, interkonektorët me sistemet tjera, dhe për të garantuar aftësinë afatgjate të rrjetit për të përmbushur kërkesat për transmetimin e energjisë elektrike;
- 1.37 **Tarifa për shfrytëzimin e sistemit të transmetimit apo Tarifa SHST** - tarifa e rregulluar që aplikohet nga OST për transmetimin e energjisë elektrike;
- 1.38 **Tarifat e operatorit të sistemit apo Tarifa OS** - tarifat e aplikuara nga OST për kryerjen e shërbimeve të operatorit të sistemit;
- 1.39 **Operator i Tregut** - personi fizik ose juridik, i licencuar nga Zyra e Rregullatorit për Energji dhe është përgjegjës për të operuar dhe organizuar tregun e energjisë elektrike në Kosovë;
- 1.40 **Tarifat e operatorit të tregut apo Tarifa OT** - nënkupton tarifën e rregulluar që aplikohet nga OT-ja për ofrimin e shërbimeve të operatorit të tregut;
- 2 Termat e tjera të kësaj rregulle do ta kenë kuptimin që u është dhënë në Ligjin për Rregullatorin e Energjisë, Ligjin për Energjinë Elektrike apo në Ligjin për Energjinë.

KREU II

E DREJTA PËR SHËRBIM UNIVERSAL

Neni 3

Shërbimi universal

- 1 Të gjithë konsumatorët finalë shtëpiakë dhe jo-shtëpiakë me qarkullim vjetor prej më pak se dhjetë (10) milionë euro ose jo më shumë pesëdhjetë (50) punëtorë kanë të drejtën e shërbimit universal. Kolektivisht, këta konsumatorë referohen si konsumatorët e shërbimit universal.
- 2 Një konsumator i shërbimit universal duhet të furnizohet me energji elektrike me çmime të arsyeshme, transparente dhe jo-diskriminuese me kualitet të caktuar.

Neni 4

Përcaktimi i çmimit të arsyeshëm

- 1 Çmimet për konsumatorët e shërbimit universal do të konsiderohen të arsyeshme, nëse ato përfaqësojnë çmimin që një furnizues në një treg efektivisht konkurrent pritët të furnizojë me energji elektrike konsumatorët e këtij shërbimi.
- 2 Para përcaktimit të çmimeve për konsumatorët e shërbimit universal, Rregullatori do të vlerësojë nivelin e konkurrencës në furnizimin me pakicë të konsumatorëve të shërbimit universal në përputhje me nenin 5 më poshtë.
- 3 Kur tregu me pakicë i furnizimit për konsumatorët e shërbimit universal vlerësohet si jo konkurrent, Rregullatori do të vlerësojë arsyeshmerinë e çmimeve të parregulluara të ngarkuara tek konsumatorët e shërbimit universal.
- 4 Me qëllim që të demonstronhet se një çmim i ngarkuar për të gjitha ose për ndonjë klasë të konsumatorëve të shërbimit universal është i arsyeshëm, në përputhje me paragrafin 3 më sipër, furnizuesi i licencuar mund:
 - 4.1 Të demonstrojë se çmimi i ngarkuar për konsumatorët e shërbimit universal është i barabartë ose më i vogël se një çmim i rregulluar i miratuar nga Rregullatori në pajtim me këtë Rregull;
 - 4.2 Aty ku nuk ka çmim të rregulluar në fuqi për çdo klasë të konsumatorëve të shërbimit universal, të ofrojë informata bindëse për Rregullatorin se çmimi i ngarkuar për konsumatorët e shërbimit universal paraqet rezultatin e një prokurimi konkurrues të furnizimit me shumicë të energjisë elektrike, tarifat e rrjetit të rregulluar (OST/OT dhe OSSH) dhe një marzhë të përcaktuar nga Rregullatori;
 - 4.3 Kostot e energjisë elektrike të blerë duhet të realizohen në mënyrë konkurruese.

- 5 Kur një konsumator i shërbimit universal zgjedh të furnizohet nga i licencuari për furnizim sipas kushteve të kontratës së furnizimit konkurrent:
- 5.1 Termat dhe kushtet e furnizimit duhet të përcaktohen reciprokisht ndërmjet të licencuarit për furnizim dhe konsumatorit të shërbimit universal dhe nuk përfaqësojnë një ofertë për furnizim universal;
 - 5.2 Konsumatori i shërbimit universal ka të drejtën për t'u furnizuar nga furnizuesi i licencuar që ka obligim të shërbimit universal në përputhje me ofertën e shërbimit të furnizimit universal të atij furnizuesi për aq kohë sa që ai i plotëson kërkesat e nenit 3, paragrafi 1 më sipër;
 - 5.3 Një konsumator i shërbimit universal që kalon nga furnizuesi pa detyrim të shërbimit universal tek furnizuesi që ka një detyrim të tillë duhet të bëjë këtë në përputhje me të gjitha kërkesat e përcaktuara në legjislacionin përkatës.

Neni 5

Vlerësimi i konkurrencës në tregun e shitjes me pakicë

- 1 Rregullatori do të kryejë një vlerësim të efektivitetit të konkurrencës në tregun e energjisë elektrike me pakicë për konsumatorët e shërbimit universal së paku çdo dy (2) vite.
- 2 Vlerësimi i konkurrencës së tregut të shitjes me pakicë do të shfrytëzojë indikatorë të verifikueshëm dhe të matshëm të nivelit të konkurrencës në furnizimin me pakicë të energjisë elektrike për të gjithë konsumatorët e shërbimit universal dhe veç e veç për konsumatorët familjarë dhe për konsumatorët komercialë të cilët kanë të drejtën e shërbimit universal.
- 3 Vlerësimi i konkurrencës së tregut të shitjes me pakicë do të përfshijë:
 - 3.1 Një vlerësim të nivelit të konkurrencës në tregun e furnizimit me pakicë të energjisë elektrike për konsumatorët e shërbimit universal;
 - 3.2 Vlerësimin e Rregullatorit nëse konkurrenca konsiderohet efektive apo jo;
 - 3.3 Vlerësimin e Rregullatorit nëse konkurrenca joefektive kërkon rregullimin e çmimeve për të siguruar që konsumatorët e shërbimit universal të furnizohen me një çmim të arsyeshëm;
 - 3.4 Një plan veprimi kohor për heqjen e rregullimit të tillë të çmimeve, në pajtim me nenin 38 të Ligjit për Energjinë Elektrike 05/L-085. Ky plan veprimi do të përditësohet çdo vit.

KREU III

OBLIGIMI I SHËRBIMIT PUBLIK

Neni 6

Vendosja e obligimit të shërbimit publik

- 1 Për të siguruar ofrimin e furnizimit në kuadër të shërbimit universal, Rregullatori mund të ngarkojë me obligime të shërbimit publik cilindo furnizues, duke obliguar atë që të ofrojë furnizim me energji elektrike konsumatorëve që gëzojnë të drejtën e furnizimit në kuadër të shërbimit universal.
- 2 Obligimi i shërbimit universal duhet të vendoset mbi furnizuesin e shërbimit publik dhe do të rishikohet të paktën çdo tre (3) vjet ose një periudhë më të shkurtër sipas vlerësimit të Rregullatorit.
- 3 Para ri-vendosjes së një obligimi të shërbimit universal mbi furnizuesin e shërbimit publik, Rregullatori do të kryejë një vlerësim të kushteve të furnizimit në përputhje me kërkesat e nenit 5 të Ligjit për Energjinë Elektrike 05 / L-085.

Neni 7

Rregullimi i çmimeve për Furnizuesin e Shërbimit Universal

- 1 Pas vlerësimit të konkurrencës së tregut me pakicë të kryer në përputhje me nenin 5 të kësaj rregulle, Rregullatori mund të përcaktojë se çmimet për disa ose të gjithë konsumatorët e shërbimit universal duhet të rregullohen për të siguruar që ato të jenë të arsyeshme.
- 2 Kur Rregullatori bën një përcaktim të tillë, furnizuesi i shërbimit universal do të përgatis dhe dorëzojë te Rregullatori çmimet e propozuara për furnizimin e konsumatorëve të shërbimit universal.
- 3 Këto propozime do të jenë në përputhje me kushtet e përcaktuara në këtë Rregull dhe do të përfshijnë provat e nevojshme për të mbështetur tarifat e propozuara.
- 4 Furnizuesi i Shërbimit Universal do të mbajë llogari të ndara kontabël në mes të aktiviteteve të rregulluara të Furnizimit të Shërbimit Universal dhe aktiviteteve të tjera komerciale.

KREU IV

TARIFA E SHITJES ME PAKICË PËR KONSUMATORËT E SHËRBIMIT UNIVERSAL

Neni 8

Parimet e përgjithshme

- 1 Furnizuesi i Shërbimit Universal i ngarkon konsumatorët e rregulluar me tarifën me pakicë për shërbimin universal të miratuar nga Rregullatori.
- 2 Tarifa me pakicë për konsumatorët e shërbimit universal përcaktohet dhe miratohet gjatë çdo viti relevant, ashtu që:
 - 2.1 Të hyrat që Furnizuesi i Shërbimit Universal parashikon të mbledhë nga tarifat me pakicë për konsumatorët e shërbimit universal do të mbulojnë të gjitha kostot për ofrimin e shërbimit universal (Kreu V); dhe
 - 2.2 Tarifa me pakicë për konsumatorët e shërbimit universal të jetë në përputhje me parimet e përcaktuara në metodologjinë e strukturës tarifore (Kreu VII).
- 3 Të hyrat e rregulluara të FSHU-së përcaktohen si vijon:
 - 3.1 Të hyrat e rregulluara të shërbimit universal përcaktohen çdo vit relevant tarifor;
 - 3.2 Propozimi për të hyrat e rregulluara do të dorëzohet nga FSHU tek Rregullatori për aprovim para çdo viti relevant tarifor;
 - 3.3 Llogaritja e të hyrave të rregulluara të shërbimit universal përdor vlerat hyrëse të caktuara gjatë shqyrtimeve të vlerave hyrëse; dhe
 - 3.4 Shqyrtimet e jashtëzakonshme, që përfshijnë përshtatjen e të hyrave të rregulluara të shërbimit universal për ndryshimet materiale në kosto apo në të hyra e që shkaktohet nga një ngjarje e jashtëzakonshme, do të realizohen kur është e nevojshme.

Neni 9

Shqyrtimet e vlerave hyrëse

- 1 Vlerat hyrëse të cilat përdoren për llogaritjen e të hyrave të rregulluara të shërbimit universal të FSHU-së do të caktohen gjatë shqyrtimeve të vlerave hyrëse. Ndryshimet në vlerat hyrëse duhet të bëhen vetëm në atë masë që këto ndryshime të jenë të arsyeshme, të justifikuara dhe të caktuara me kujdes.
- 2 Shqyrtimet e vlerave hyrëse do të iniciohen nga Rregullatori kurdo që rrethanat e ndryshuara kërkojnë iniciimin e një shqyrtimi të tillë.

- 3 FSHU mund t'i propozojë Rregullatorit fillimin e shqyrtimit të vlerave hyrëse. Rregullatori do t'i përgjigjet kërkesës së tillë me një shkresë që paraqet arsyetimet për vendimin e tij për të filluar apo për të mos filluar shqyrtimin.
- 4 Procedura për mbarëvajtjen e shqyrtimeve të vlerave hyrëse është dhënë në Shtojcën 3.

Neni 10

Përshtatjet e të hyrave të rregulluara

- 1 Ndryshimi në të hyrat e rregulluara të shërbimit universal që mund të rezultojë si pasojë e ndryshimit në mes të të hyrave të lejuara dhe kostove të realizuara do të bëhet gjatë përshtatjeve vjetore.
- 2 Përshtatjet për të Hyrat e Rregulluara të FSHU-së do të marrin parasysh ndryshimet në mes të të hyrave të realizuara dhe të kostove të realizuara për ato kategori e shpenzimeve që varen në mënyrë direkte nga niveli i furnizimit.
- 3 Përshtatjet vjetore do të bëhen para çdo viti relevant sipas procesit të përshkruar në Shtojcën 4.
- 4 Formulatat për llogaritjen e të hyrave të rregulluara të shërbimit universal gjatë azhurnimeve vjetore janë dhënë në Shtojcën 1.

Neni 11

Shqyrtimet e jashtëzakonshme

- 1 Shqyrtimet e jashtëzakonshme mund të shkaktohen nga ngjarjet e jashtëzakonshme, siç përkufizohen në Shtojcën 6.
- 2 Gjatë shqyrtimeve të jashtëzakonshme do të llogaritet ndikimi i ngjarjes së jashtëzakonshme në të hyrat e rregulluara të shërbimit universal për pjesën e mbetur të periudhës rregullative. Nëse ndikimi është më i lartë se pragu i materialitetit, atëherë do të bëhet përshtatja në të hyrat e rregulluara të shërbimit universal. Pragu i materialitetit do të jetë 5% e të hyrave, përveç nëse përcaktohet ndryshe me marrëveshje të përbashkët në mes të FSHU-së dhe Rregullatorit.
- 3 Llogaritja e ndikimit mbi të hyrat e rregulluara të shërbimit universal dhe përshtatja e të hyrave nuk duhet të marrë parasysh faktorët të cilët nuk ndikohen në mënyrë direkte nga ngjarja e jashtëzakonshme.
- 4 Rregullatori do të marrë parasysh ndikimet e vazhdueshme të ngjarjeve të jashtëzakonshme (që e kalojnë pragon e materialitetit) në përshtatjet e ardhshme vjetore.
- 5 Procesi për realizimin e shqyrtimeve të jashtëzakonshme jepet në Shtojcën 5.

Neni 12**Përkufizimi i vlerave hyrëse**

- 1 Vlerat hyrëse janë parametrat kryesorë të cilat përdoren për llogaritjen e të hyrave të rregulluara të Furnizuesit të Shërbimit Universal.
- 2 Vlerat pasuese mund të specifikohen si fikse apo si tabelë vlerash me ç'rast do të aplikohet vlerë e ndryshme për çdo vit relevant nga viti i tanishëm relevant deri në shqyrtimin e ardhshëm të vlerave hyrëse.
- 3 Vlerat hyrëse përbëhen nga:
 - 3.1 Jetëgjatësia ekonomike e aseteve të lidhura me FSHU;
 - 3.2 Marzha me pakicë;
 - 3.3 Niveli i lejuar për borxhet e këqija;
 - 3.4 Faktori ndarës balancues; dhe
 - 3.5 Ndonjë parametër tjetër hyrës që rregullatori mund ta konsiderojë të nevojshëm.
- 4 Vlerat hyrëse përcakohen për periudhë tre (3) vjeqare.
 - 4.1 Marzha me pakicë;
 - 4.2 Niveli i lejuar për borxhet e këqija; dhe
 - 4.3 Faktori ndarës i jobalancit.

Neni 13**Parimet e përgjithshme**

- 1 Të hyrat e rregulluara të shërbimit universal do të jenë të barabarta me kostot e arsyeshme të FSHU-së për ofrimin e shërbimeve standarde për konsumatorët e rregulluar, për aq sa këto kosto do të jenë të arsyeshme dhe të matura saktësisht.
- 2 Kostot e arsyeshme të FSHU-së do të përfshijnë:
 - 2.1 Kostot e lejuara me pakicë (Neni 14);
 - 2.2 Kostot e lejuara të kapitalit punues (Neni 15);
 - 2.3 Kostot e lejuara të borxhit të keq (Neni 16);
 - 2.4 Kostot e lejuara të energjisë elektrike me shumicë (Neni 17);
 - 2.5 Kostot e bartura të cilat përfshijnë kostot e rrjetit të OST/OT, OSSH-së dhe taksat për licenca, të cilat barten plotësisht, gjatë azhurnimeve vjetore.
- 3 Gjatë përcaktimit të kostove të lejuara, rregullatori do t'u referohet, por nuk kufizohet në:
 - 3.1 Informatat ekzistuese të periudhave të kaluara për vëllimin, koston dhe kualitetin e shërbimeve të FSHU-së;
 - 3.2 Parashikimin rreth vëllimit, kostove dhe kualitetit të shërbimeve të FSHU-së;
 - 3.3 Krahasimet me ndërmarrje të ngjashme në Kosovë dhe shtete të tjera në Evropë, duke marrë parasysh ngjashmëritë në mes të industrisë së energjisë elektrike në ato shtete me atë të Kosovës; dhe
 - 3.4 Krahasimet me kostot e aktiviteteve të ngjashme në Kosovë dhe shtete të tjera në Evropë, duke marrë parasysh ngjashmëritë në mes të industrisë së energjisë elektrike në ato shtete me atë të Kosovës.
- 4 Kostot e arsyeshme do t'u alokohen konsumatorëve të rregulluar siç parasheh Neni 19.
- 5 Çdo e hyrë tjetër, që nuk është mbledhur nga tarifat, por që ka të bëjë me ofrimin e shërbimeve standarde për konsumatorët e rregulluar, do të zbritet nga të hyrat e rregulluara të shërbimit universal, duke përfshirë çfarëdo ndryshimi në mes të vlerës së shitjeve të aseteve dhe vlerës së tyre rregullative.

Neni 14

Kostot e lejuara me pakicë

- 1 Kostot e lejuara me pakicë përfshijnë kostot që kanë të bëjnë me furnizimin e konsumatorëve të rregulluar:
 - 1.1 Kostot e lejuara operative dhe të mirëmbajtjes;
 - 1.2 Kostot e korporatës;
 - 1.3 Kostot e zhvlerësimit; dhe
 - 1.4 Kosto tjera të cilat janë jashtë kontrollit të FSHU-së.
- 2 Kostot e lejuara operative dhe të mirëmbajtjes nuk do të përfshijnë kostot e reklamimit dhe formave të tjera të marketingut dhe tatimet apo detyrimet që synohet të mblidhen përmes marzhës me pakicë.
- 3 Kostot e lejuara të korporatës përfshijnë kostot (ose një pjesë të koston totale të korporatës nëse FSHU-ja është kompani vartëse apo kompani degë e ndonjë entiteti tjetër) që janë të nevojshme dhe i atribuohen funksionimit të rregullt të FSHU-së por që, në pajtim me standartet ndërkombëtare të kontabilitetit, nuk lidhen drejtpërsëdrejti me ofrimin e shërbimeve standarde për konsumatorët e rregulluar.
- 4 Kostot për komunikimet publike për informata rreth sigurisë, kursimit, inkurajimit të pagesave të rregullta dhe dekurajimit të shfrytëzimit të paautorizuar janë kosto të lejueshme.

Neni 15

Kostot e lejuara të kapitalit punues

- 1 Kostot e kapitalit punues do të llogariten si kostoja e financimit të kapitalit punues për FSHU-në, shumëzuar me vlerën e lejuar të kapitalit punues.
- 2 Kostoja e financimit të kapitalit punues do të llogaritet si EURIBOR plus S%, ku S paraqet vlerën e përcaktuar nga Rregullatori gjatë përshtatjeve vjetore dhe reflekton preminë e pagueshme nga i licencuari për huatë afatshkurtra.
- 3 Vlera e lejuar e kapitalit punues do të llogaritet si 1/12-ta e shumës së kostove të lejuara me pakicë, kostot e lejuara të energjisë me shumicë, kostot e lejuara të kapacitetit me shumicë dhe kostot që barten.

Neni 16

Kostot e lejuara të borxhit të keq

- 1 Kostot e lejuara të borxhit të keq do të llogariten duke aplikuar nivelin e lejuar të borxhit të keq sipas formulave të dhëna në Shtojcën 1.
- 2 Niveli i lejuar i borxhit të keq do të vendoset nga Rregullatori gjatë përcaktimit të vlerave hyrëse.

Neni 17

Kostot e blerjes së energjisë me shumicë

- 1 Furnizuesi i Shërbimit Universal është i detyruar të sigurojë energji elektrike në mënyrë transparente, konkurruese dhe efikase.
- 2 Furnizuesi i Shërbimit Universal duhet të demonstrojë se çmimet e parashikuara të energjisë elektrike që do të prokurohen janë të arsyeshme. Kjo mund të përfshijë, por nuk kufizohet, në demonstrimin se:
 - 2.1 Çmimet e parashikuara janë në përputhje me çmimet historike dhe ato të projektuara të tregut me shumicë të Kosovës;
 - 2.2 Çmimet e parashikuara janë në përputhje me çmimet historike dhe të projektuara të tregut me shumicë të rajonit;
 - 2.3 Çmimet që rezultojnë nga një prokurim konkurrues i furnizimeve me shumicë të energjisë elektrike;
 - 2.4 Çmimet janë në përputhje me tarifat e rregulluara të aplikuara për blerjet ku këto janë rezultat i një obligimit të imponuar për të licencuarit.
- 3 Kostot e lejuara të energjisë me shumicë që kanë të bëjnë me shërbimin për konsumatorët e rregulluar përfshijnë:
 - 3.1 Kostot e blerjes së energjisë nga gjenerimi vendor;
 - 3.2 Kostot e importit të energjisë;
 - 3.3 Marzhën me pakicë në blerjet e energjisë;
 - 3.4 Kostot neto të jobalancit, që i nënshtrohen faktorit ndarës të jobalancit.

- 4 Kostot e lejuara neto të jobalancit do të përfshijnë kostot e realizuara minus të hyrat e fituara (siç përcaktohen në pajtueshmëri me rregullat e tregut) që rezultojnë nga jobalancet në mes të kërkesës së realizuar nga konsumatorët e rregulluar dhe furnizimi i nominuar për energji.
- 5 Faktori ndarës i jobalancit duhet të jetë një përqindje fikse që aplikohet në kostot neto të jobalancit për të përcaktuar ndarjen e këtyre shpenzimeve në mes të FSHU-së dhe konsumatorëve të rregulluar, ku vlera prej 0% nënkupton që të gjitha kostot neto të jobalancit i alokohen FSHU-së, ndërsa vlera prej 100% nënkupton që të gjitha kostot neto të jobalancit u alokohen konsumatorëve.
- 6 Gjatë përcaktimit të Faktorit ndarës të jobalancit, rregullatori duhet të marrë parasysh se deri në ç'masë është në gjendje FSHU-ja që të menaxhojë jobalancet dhe, në veçanti, balancin në mes të furnizimeve nga prodhimi vendor dhe importet e qëndrueshme si dhe kërkesës së përmbushur nga FSHU-ja.
- 7 Verifikimi i kostove me shumicë të energjisë për të siguruar shërbimin e furnizimit universal do të kryhet në përputhje me parimet e përcaktuara në Shtojcën 2.
- 8 Marzha me pakicë do të jetë një përqindje fikse që aplikohet në kostot e lejuara të energjisë me shumicë dhe kostot e lejuara të kapacitetit me shumicë. Ajo duhet të caktohet në atë nivel që:
 - 8.1 T'i sigurojë FSHU-së përfitim të arsyeshëm që ta kompensojë për rreziqet që ndërmerr gjatë ofrimit të shërbimit standard për konsumatorët e rregulluar. Kjo duhet të llogaritet duke iu referuar marzhave të fituara nga kompanitë e ngjashme në vende të tjera në Evropë, duke marrë parasysh ngjashmëritë në mes të industrisë së energjisë elektrike në ato vende dhe atë të Kosovës; dhe
 - 8.2 T'i sigurojë FSHU-së kthim të arsyeshëm nga asetet fikse neto të saj të përdorura gjatë ofrimit të shërbimit standard për konsumatorët e rregulluar. Kjo duhet të llogaritet duke iu referuar kostos së kapitalit të të licencuarve të tjerë në Kosovë.

Neni 18

Kostot që barten

- 1 Kostot të cilat FSHU-ja duhet t'i mbulojë gjatë përshtatjeve vjetore përfshijnë:
 - 1.1 Kostot e OT-së që faturohen nga OT dhe kanë të bëjnë me konsumatorët e shërbimit universal;
 - 1.2 Kostot e OS-së që faturohen nga OST dhe kanë të bëjnë me konsumatorët e shërbimit universal;
 - 1.3 Kostot SHST që faturohen nga OST dhe kanë të bëjnë me konsumatorët e shërbimit universal;

- 1.4 Kostot për shfrytëzimin e sistemit të shpërndarjes që faturohen nga OSSH dhe kanë të bëjnë konsumatorët e shërbimit universal; dhe
- 1.5 Pjesën e taksës së licencës që u përket konsumatorëve të shërbimit universal.

Neni 19

Alokimi i kostove

- 1 Kostot e arsyeshme të llogaritura sipas këtij kapitulli do të alokohen si më poshtë:
 - 1.1 Kostot e lejuara me pakicë dhe kostot e lejuara të kapitalit punues do të alokohen në proporcion me numrin e konsumatorëve;
 - 1.2 Kostot e lejuara të energjisë me shumicë do t'u alokohen konsumatorëve të rregulluar në një mënyrë që nuk e pengon konkurrencën për konsumatorët e parregulluar;
 - 1.3 Kostot që barten duhet t'u alokohen konsumatorëve të rregulluar në një mënyrë që ruan, aq sa është e mundur, sinjalin e çmimeve.

Neni 20

Metodologjia për strukturimin e tarifës me pakicë për konsumatorët e shërbimit universal

- 1 Struktura e tarifës me pakicë për konsumatorët e shërbimit universal do të jetë në përputhje me metodologjinë e caktuar në këtë nen dhe me udhëzimet e tjera që mund të nxirren nga Rregullatori.
- 2 Një bashkësi e vetme e çmimeve do të aplikohet për cilindo kategori të konsumatorëve.
- 3 Tarifa me pakicë për konsumatorët e shërbimit universal nuk do të ketë ndër-subvencionim në mes të kategorive të konsumatorëve.
- 4 Tarifa me pakicë për konsumatorët e shërbimit universal do të marrë parasysh çështjet mjedisore.
- 5 Tarifat me blloqe mund të përdoren për të nxitur konsumin eficient të energjisë elektrike. Njëkohësisht, këto tarifa mund të përdoren për raste sociale kur rregullatori mbi bazë të dëshmive në dispozicion nuk është i kënaqur me nivelin e mbulueshmërisë së konsumatorëve në nevojë nga mekanizmat e tjerë subvencionues.
- 6 Tarifa me pakicë për konsumatorët e shërbimit universal mund të përfshijë tarifat ditë-natë për të nxitur konsumin efikas të energjisë elektrike në rastet kur ka matës adekuat për këtë qëllim dhe në rastet kur kjo justifikohet nga profili i ngarkesës.
- 7 Tarifa me pakicë për konsumatorët e shërbimit universal mund të ndryshojë për të reflektuar koston sezonale të ofrimit të shërbimit, për të nxitur konsumin efikas të energjisë elektrike.
- 8 Tarifa e rregulluar me pakicë do të reflektojë koston e furnizimit të kategorive të ndryshme të konsumatorëve, në mënyrë që:
 - 8.1 Të ruajë me saktësi sinjalet e tarifave të rrjetit të transmetimit, shpërndarjes dhe taksës për licencë deri në masën e lejuar;
 - 8.2 Të mbulojë kostot me pakicë dhe kostot e kapitalit punues që kanë të bëjnë me furnizimin e secilës kategori të konsumatorëve; dhe
 - 8.3 Të reflektojë koston e furnizimit të kategorive të konsumatorëve gjatë stinëve dhe kohëve të ndryshme brenda ditës.

KREU VIII DISPOZITAT KALIMTARE DHE PËRFUNDIMTARE

**Neni 21
Ndryshimi**

- 1 ZRRE mban të drejtën që ta ndryshojë ose ta modifikojë çdo dispozitë të kësaj rregulle.
- 2 Procedurat për ndryshim ose modifikim të kësaj rregulle do të jenë të njëjta si për miratimin e saj.

**Neni 22
Interpretimi**

Në rast se ka paqartësi për dispozitat e kësaj rregulle, Bordi do të nxjerrë informacione shpjeguese.

**Neni 23
Shfuqizimi**

Shfuqizimi Kjo rregull shfuqizon rregullën e mëparshme të titulluar: *"Rregullën për vendosjen e çmimeve të furnizuesit publik të energjisë elektrike"* (Rregulla për Çmimet e FPEE-së) të aprovuara nga Bordi i Rregullatorit në vitin 2011.


**Neni 24
Hyrja në fuqi**

Kjo rregull hyn në fuqi në ditën e aprovimit nga Bordi i Rregullatorit dhe do të publikohet në faqen zyrtare elektronike të Rregullatorit.


Bordi i Zyrës së Rregullatorit për Energji:



Krenar Bujupi, U.D. Kryesues



Arsim Janova, Anëtar



Besim Sejfiqaj, Anëtar

SHTOJCA 1 LLOGARITJA E TË HYRAVE TË RREGULLUARA

- 1 Kjo shtojcë paraqet formulat për llogaritjen e të hyrave të rregulluara të Furnizuesit të Shërbimit Universal dhe plotëson parimet e dhëna në pjesën e parë të Rregullës.
- 2 Të hyrat e rregulluara të FSHU do të llogariten në bazë të azhurnimeve vjetore me anë të kësaj formule:

$$USRR_t = (RETR_t + WCLC_t + WHPC_t + PSTC_t - NTFR_t + ADJ_t) / (1 - BDTA_t)$$

Ku:

$USRR_t$ Të hyrat e rregulluara të Furnizuesit të Shërbimit Universal në vitin relevant t (Universal Service Supplier Regulated Revenue in relevant year t)

$RETR_t$ Kostot e lejuara me pakicë në vitin relevant t, të cilat caktohen gjatë përshtatjeve vjetore (Retail costs in Relevant Year t, which is set at Annual Adjustments)

$WCLC_t$ Kostoja e lejuar e kapitalit në vitin relevant t (Working capital costs in Relevant Year t)

$WHPC_t$ Kostot e lejuara të energjisë me shumicë për qëllim të ofrimit të shërbimit universal gjatë vitit relevant t (Wholesale power costs for the provision of Universal Supply Service in Relevant Year t)

$PSTC_t$ Kostot që barten gjatë vitit relevant t (Pass-Through Costs in Relevant Year t)

$NTFR_t$ Të hyrat jotarifore në vitin relevant t (Non-tariff revenues in Relevant Year t)

ADJ_t Përshtatja e të hyrave gjatë vitit relevant t (Revenue correction factor in Relevant Year t)

$BDTA_t$ Kostot e lejuara për borxhin e keq gjatë vitit relevant t (Bad Debt Allowance in Relevant Year t)

- 2.1 Kostot e lejuara të kapitalit punues ($WCLC_t$) do të llogariten sipas formulës:

$$WCLC = (1 / 12) * I_t * (RETR_t + WHPC_t + PSTC_t - NTFR_t)$$

Ku:

I_t paraqet normën e interesit të realizuar në vitin relevant t, që llogaritet bazuar në EURIBOR plus S%, ku S paraqet vlerën e përcaktuar nga rregullatori gjatë përshtatjeve vjetore dhe që reflekton preminë e pagueshme nga i licencuari për huat afatshkurtra;

$RETR_t$ Kostot e lejuara me pakicë në vitin relevant t (Allowed Retail Costs in Relevant Year t)

$WHPC_t$ Kostot e energjisë me shumicë në vitin relevant t (Allowed wholesale power costs in Relevant Year t)

$PSTC_t$ Kostot që barten në vitin relevant t (Pass-Through Costs in Relevant Year t)

$NTFR_t$ Të hyrat jotarifore në vitin relevant t (Non-tariff revenues in Relevant Year t)

2.2 Kostot e lejuara të energjisë me shumicë ($WHPC_t$) duhet të llogariten sipas formulës:

$$WHPC_t = (GENC_t + IMPC_t + IMBC_t * IMBF_t) * (1 + RETM_t)$$

Ku:

$GENC_t$ Kostot e lejuara të blerjes së energjisë nga gjeneratorët vendorë në vitin relevant t (Allowed costs of purchases from domestic generation in Relevant Year t)

$IMPC_t$ Kostot e lejuara të energjisë së importit në vitin relevant t (Allowed energy import costs in Relevant Year t)

$IMBC_t$ Kostot neto të imbalancit në vitin relevant t (Allowed net imbalance costs in Relevant Year t)

$IMBF_t$ Faktori ndarës i imbalancit në vitin relevant t (Imbalance Sharing Factor in Relevant Year t)

$RETM_t$ Marzha me pakicë në vitin relevant t (Retail Margin in Relevant Year t)

2.3 Faktori i përshtatjes së të hyrave (ADJ_t) do të llogaritet duke përdorur formulën në vijim:

$$ADJ_t = (AAC_{t-1} - ARR_{t-1}) * (1 + I_t)$$

Ku:

ACC_{t-1} Kostot e lejuara aktuale të FSHU-së në vitin relevant t (Allowed actual USS costs in Relevant Year t)

ARR_{t-1} Të hyrat aktuale të rregulluara gjatë vitit relevant t-1 (Actual Regulated Revenues in Relevant Year t-1)

I_t Është definuar më lartë

SHTOJCA 2

PROCESI I SHQYRTIMIT TË VLERAVE HYRËSE

- 1 Me qëllim të ngritjes së transparencës, rregullatori do të publikojë në faqen elektronike zyrtare të gjitha dokumentet e dorëzuara, komentet dhe dokumentet e tjera relevante të pranuar nga FSHU apo palët e tjera të interesit që kanë të bëjnë me shqyrtimin e vlerave, duke mos përfshirë këtu informatat që Rregullatori i konsideron komercialisht konfidenciale.
- 2 Shqyrtimi i vlerave hyrëse duhet të fillojë jo më vonë se 120 ditë pune para fillimit të vitit të ardhshëm relevant tarifor.
- 3 Rregullatori do të iniciojë shqyrtimin e vlerave hyrëse duke njoftuar FSHU-në lidhur me:
 - 3.1 Vitet për të cilat kërkohen të dhënat aktuale dhe parashikimet për të ardhmen;
 - 3.2 Formatin me anë të të cilit këto të dhëna do të dorëzohen;
 - 3.3 Orarin për dorëzimin e propozimit të FSHU-së për shqyrtimin e vlerave hyrëse.
- 4 Propozimi i FSHU-së do të përmbajë informacionin e mëposhtëm dhe do të adresojë çështjet në vijim (pa kufizim):
 - 4.1 Të hyrat e realizuara të rregulluara që janë fituar nga tarifat me pakicë për konsumatorët e shërbimeve universale gjatë vitit relevant (duke përdorur një vlerësim të arsyeshëm për muajt e mbetur kur është e nevojshme);
 - 4.2 Koston e realizuar për ofrimin e shërbimeve për konsumatorët e rregulluar gjatë vitit relevant, në linjë me përkufizimin e koston që është përdorur për llogaritjen e të hyrave të rregulluara të shërbimit universale;
 - 4.3 Raportin vjetor dhe pasqyrat financiare të audituara për secilin vit fiskal që ka përfunduar në vitin relevant aktual, kur këto janë në dispozicion sipas kritereve për raportim të cilat i përmban licenca e FSHU-së;
 - 4.4 Konsumin e energjisë elektrike të realizuar gjatë periudhës së fundit 12- mujore;
 - 4.5 Parashikimin e konsumit të energjisë elektrike për vitin relevant;
 - 4.6 Numrin e konsumatorëve të rregulluar dhe të parregulluar për vitin e tanishëm relevant;
 - 4.7 Numrin e parashikuar të konsumatorëve të rregulluar dhe të parregulluar për vitin e ardhshëm relevant;
 - 4.8 Të hyrat e rregulluara të shërbimeve universale të parashikuara, duke raportuar ndaras për secilën prej komponentëve të koston së lejuar, për vitin e ardhshëm relevant;

- 4.9 Përcaktuesit aktualë të faturimit për periudhën e fundit 12-mujore si dhe përcaktuesit e parashikuar të faturimit për vitin e ardhshëm relevant, bazuar në parashikimet lidhur me kërkesën, energjinë dhe numrin e konsumatorëve për secilën kategori;
- 4.10 Vlerat hyrëse të propozuara për vitin e ardhshëm relevant;
- 4.11 Çdo studim të realizuar nga FSHU-ja që ka të bëjë me ndonjërin prej çështjeve të ngritura në propozimin e FSHU-së; dhe
- 4.12 Çdo material tjetër shtesë që rregullatori konsideron se duhet të përfshihet në propozimin e FSHU-së.
- 5 Gjatë përgatitjes së propozimit të saj, FSHU do të zbatojë plotësisht parimet e kësaj rregulle. FSHU do të deklarojë të gjitha vendet ku nuk janë zbatuar këto parime, arsyet për moszbatimin e tyre, arsyet që përkrahin qasjen alternative dhe vlerësimin e ndikimit të përdorimit të kësaj qasjeje.
- 6 Pas marrjes së propozimit të FSHU-së, Rregullatori do të vlerësojë saktësinë, lidhshmërinë dhe arsyeshmërinë, duke përfshirë përcaktimin nëse:
- 6.1 Propozimi për vlerat hyrëse reflekton kostot e arsyeshme të ofrimit të shërbimeve për konsumatorët e rregulluar; dhe
- 6.2 Propozimi për tarifën e rregulluar me pakicë duhet të reflektojë balancim të drejtë në mes të interesave të FSHU-së dhe të konsumatorëve të rregulluar.
- 7 Rregullatori do të përgatisë një vlerësim të përkohshëm brenda një afati të arsyeshëm kohor (të përcaktuar në pikën 3 të kësaj shtojce), para fillimit të vitit të ardhshëm relevant pas shqyrtimit të aplikacionit të FSHU-së dhe pas konsultimit me FSHU-në.
- 8 Vlerësimi i përkohshëm do të paraqesë propozimet e rregullatorit për vlerat hyrëse dhe arsyeshmërinë për këtë propozim. Rregullatori gjatë përgatitjes së vlerësimit të përkohshëm mund të plotësojë-ndryshojë, të ndryshojë apo të fshijë cilëndo pjesë të propozimit të FSHU-së sipas vlerësimit të tij në rastet kur rregullatori ofron arsyeshmërinë për këto plotësim-ndryshime, zhvendosje apo fshirje.
- 9 Pas përcaktimit të vlerësimit të përkohshëm, rregullatori do të njoftojë FSHU-në dhe do të fillojë procesin e konsultimit publik mbi vlerësimin e përkohshëm në pajtim me Ligjin për Rregullatorin e Energjisë.
- 10 Pas përfundimit të konsultimit publik, brenda një afati të arsyeshëm kohor (të përcaktuar në pikën 3 të kësaj shtojce), para fillimit të vitit të ardhshëm relevant, rregullatori do të marrë vendim për vlerat hyrëse. Ky vendim do të jetë në pajtueshmëri me këtë rregull.
- 11 FSHU mund të apelojë apo kontestojë vendimin e Rregullatorit në pajtim me legjisllacionin e aplikueshëm.

SHTOJCA 3

PROCESI I PËRSHTATJEVE VJETORE

- 1 Procesi i përshtatjeve vjetore për FSHU-në do të përbëhet nga tri faza:
 - 1.1 Faza 1: Përcaktimi i kostove të blerjes së energjisë me shumicë;
 - 1.2 Faza 2: Përcaktimi i kostove me pakicë;
 - 1.3 Faza 3: Përcaktimi i të hyrave të lejuara maksimale dhe tarifës së rregulluar me pakicë.

- 2 **Faza 1: Përcaktimi i kostove të blerjes së energjisë me shumicë**
 - 2.1 FSHU do të dorëzojë propozimin për kostot e blerjes së energjisë me shumicë që do të përfshihet në llogaritjen e të Hyrave të Rregulluara për vitin e ardhshëm relevant, së paku 80 ditë pune para fillimit të vitit të ardhshëm relevant. FSHU do të përfshijë po ashtu të gjitha të dhënat dhe dëshmitë relevante;
 - 2.2 Rregullatori do ta njoftojë FSHU-në së paku 60 ditë pune para fillimit të vitit të ardhshëm relevant, nëse i aprovon ose jo, kostot e blerjes së energjisë me shumicë të propozuara nga FSHU-ja;
 - 2.3 Nëse rregullatori nuk e aprovon propozimin për kostot e blerjes së energjisë me shumicë, atëherë rregullatori duhet të ofrojë një vlerë alternative për kostot që duhet të përfshihen në llogaritjen e kostove të energjisë për vitin e ardhshëm relevant. Arsyetimi dhe dëshmitë për vlerën alternative do të sigurohen në pajtim me këtë rregull.

- 3 **Faza 2: Përcaktimi i kostove me pakicë**
 - 3.1 FSHU do të dorëzojë propozimin për kostot me pakicë që duhet të përfshihen në llogaritjen e të hyrave të rregulluara të shërbimit universal për vitin e ardhshëm relevant së paku 50 ditë pune para fillimit të vitit të ardhshëm relevant. FSHU duhet të përfshijë po ashtu të gjitha të dhënat dhe dëshmitë përkatëse;
 - 3.2 Rregullatori do ta njoftojë FSHU-në së paku 40 ditë pune para fillimit të vitit të ardhshëm relevant, nëse i aprovon ose jo, kostot me pakicë të propozuara nga FSHU-ja;
 - 3.3 Nëse rregullatori nuk e aprovon propozimin për kostot me pakicë, atëherë rregullatori duhet të ofrojë një vlerë alternative për kostot me pakicë që duhet të përfshihen në llogaritjen e të hyrave të rregulluara të për vitin e ardhshëm relevant. Arsyetimi dhe dëshmitë për vlerën alternative do të sigurohen në pajtim me këtë rregull.

4 Faza 3: Përcaktimi i të hyrave të rregulluara të shërbimit universal dhe tarifës së rregulluar me pakicë

- 4.1 FSHU do të dorëzojë te rregullatori propozimin për të hyrat e rregulluara të shërbimit universal dhe përshtatjen e nevojshme për tarifën e rregulluar me pakicë për vitin e ardhshëm relevant së paku 20 ditë pune para fillimit të vitit të ardhshëm relevant. FSHU po ashtu do të përfshijë në këtë dorëzim edhe dokumentet relevante dhe evidencën, përfshirë vlerat që kanë të bëjnë me të gjithë komponentët e formulave të azhurnimit vjetor të dhëna në Shtojcën 1 si dhe çdo informatë tjetër të kërkuar nga rregullatori;
- 4.2 Rregullatori në mënyrë të arsyeshme mund të kërkojë nga FSHU që të japë sqarime shtesë për metodën e tij të llogaritjes së propozimit për të hyrat e rregulluara të shërbimit universal apo të tarifës së rregulluar me pakicë dhe, nëse kjo kërkohet, FSHU duhet të ofrojë, brenda një periudhe të shpejtë kohore, çdo informatë apo shpjegim të mëtejshëm që kërkohet nga rregullatori;
- 4.3 Rregullatori do ta informojë FSHU-në para fillimit të vitit të ardhshëm relevant nëse e aprovon llogaritjen e FSHU-së për të hyrat e rregulluara të shërbimit universal dhe për tarifën e rregulluar me pakicë;
- 4.4 Nëse rregullatori nuk e aprovon propozimin për të hyrat e rregulluara të shërbimit universal dhe tarifën e rregulluar me pakicë, rregullatori do të japë arsyetim sqarim për këtë, në pajtim me këtë rregull. Tarifa e rregulluar me pakicë nuk do të ndryshojë derisa rregullatori të aprovojë një propozim alternativ;
- 4.5 Çdo ndryshim në të hyra që mund të rezultojë nga llogaritjet e gabuara, raportimi i gabuar i të hyrave të realizuara të rregulluara apo kontestimet lidhur me azhurnimet vjetore, do të mbulohen në vitet relevante pasuese;
- 4.6 FSHU-ja mund të apelojë apo kontestojë çdo vendim të rregullatorit në pajtim me legjislacionin e aplikueshëm.

SHTOJCA 4 PROCESI I SHQYRTIMIT TË JASHTËZAKONSHËM

- 1 Nëse ka ndodhur një ngjarje e jashtëzakonshme, FSHU-ja mund të kërkojë shqyrtim të jashtëzakonshëm.
- 2 Shqyrtimi i Jashtëzakonshëm nuk mund të fillojë brenda tre muajsh të shqyrtimit të vlerave hyrëse apo të përfundimit të shqyrtimit të jashtëzakonshëm të mëhershëm.
- 3 Shqyrtimi i jashtëzakonshëm mund të ketë lidhje me më shumë se një ngjarje të jashtëzakonshme. Në këto raste, kjo shtojcë adreson ndikimin e përbashkët financiar të këtyre ngjarjeve.
- 4 Brenda 20 ditëve të punës pas kërkesës së FSHU-së për shqyrtim të jashtëzakonshëm, FSHU duhet të dorëzojë raportin për ndikimin financiar që do të përfshijë çështjet në vijim:
 - 4.1 Përshkrimin e ngjarjes së jashtëzakonshme që ka qenë shkak i kërkesës për shqyrtim të jashtëzakonshëm;
 - 4.2 Përmbledhjen e ndikimit të ngjarjes së jashtëzakonshme në veprimtarinë e FSHU-së;
 - 4.3 Vlerësimin e ndryshimeve në kostot e FSHU-së të ofrimit të shërbimeve për konsumatorët e rregulluar në secilin vit nga data kur ka ndodhur (apo filluar) ngjarja e jashtëzakonshme deri në përfundimin e vitit aktual relevant;
 - 4.4 Vlerësimin e ndryshimeve në të hyrat e parashikuara nga tarifa e rregulluar me pakicë që rezultojnë nga ngjarja e jashtëzakonshme në secilin vit nga data kur ka ndodhur (apo filluar) ngjarja e jashtëzakonshme deri në përfundimin e vitit aktual relevant;
 - 4.5 Llogaritjen e ndikimit financiar nga ngjarja e jashtëzakonshme në FSHU, e llogaritur si shuma e ndryshimeve në kostot dhe të hyrat e mësipërme të FSHU-së. Të hyrat do të trajtohen si numra pozitivë dhe kostot do të trajtohen si numra negativë; dhe
 - 4.6 Llogaritjen në lidhje me atë nëse ndikimi financiar pritet të jetë më i lartë se pragu i materialitetit.
- 5 Nëse FSHU përcakton se ndikimi financiar është më i lartë se pragu i materialitetit, atëherë do të përfshijë në raportin e saj të ndikimit financiar propozimin për përshtatjen e jashtëzakonshme të të hyrave të rregulluara të shërbimit universal dhe tarifës së rregulluar me pakicë. Propozimi për përshtatjen e jashtëzakonshme duhet të pëmbushë këto kushte:
 - 5.1 Përshtatja e jashtëzakonshme duhet të ndryshojë të hyrat e rregulluara të shërbimit universal dhe tarifën e rregulluar me pakicë, në atë mënyrë që ndryshimi i parashikuar të jetë i barabartë me ndikimin financiar të ngjarjes së jashtëzakonshme;

- 5.2 Tarifa e re e rregulluar me pakicë duhet të jetë në përputhje me metodologjinë për strukturën tarifore dhe, kurdo që është e mundur, të jetë në përputhje me strukturën tarifore që ka ekzistuar para ndodhjes së ngjarjes së jashtëzakonshme; dhe
- 5.3 Kohëzgjatja dhe mënyra e përshtatjes së jashtëzakonshme, ku është e mundur, duhet të reduktojë rritjet e menjëhershme të tarifave për kategoritë e konsumatorëve (për shembull duke zbutur efektin e përshtatjes së jashtëzakonshme përgjatë disa vitesh).
- 6 Rregullatori mund gjithashtu të fillojë shqyrtimin e jashtëzakonshëm pa kërkesën e FSHU-së. Në këto raste, rregullatori do ta njoftojë FSHU-në dhe do të përfshijë një përshkrim të ngjarjes së jashtëzakonshme si dhe një përmbledhje të ndikimit të saj të pritshëm. Pastaj, FSHU do të përgatisë raportin e ndikimit financiar sipas procesit të përshkruar më lart.
- 7 Rregullatori mund të kërkojë në mënyrë të arsyeshme sqarime shtesë për mënyrën e tij të llogaritjes së raportit të ndikimit financiar si dhe përshtatjes së jashtëzakonshme. Nëse kërkohet kjo, FSHU duhet t'i dërgojë rregullatorit, brenda një afati sa më të shkurtër kohor, informatat apo shpjegimet e mëtejshme të kërkuara.
- 8 Brenda 20 ditëve të punës pas marrjes së raportit për ndikimin financiar, Rregullatori do ta njoftojë FSHU-në nëse Rregullatori e pranon apo jo propozimin e FSHU-së për përshtatjen e jashtëzakonshme. Rregullatori do ta aprovojë propozimin nëse:
- 8.1 I plotëson kushtet e përshkruara më lart;
- 8.2 Është llogaritur në mënyrë të saktë; dhe
- 8.3 Merr parasysh të gjitha informatat materiale në dispozicion gjatë asaj kohe.
- 9 Nëse Rregullatori e aprovon propozimin për përshtatjen e jashtëzakonshme, tarifa e re e rregulluar me pakicë do të hyjë në fuqi menjëherë.
- 10 Nëse Rregullatori nuk e aprovon propozimin për përshtatjen e jashtëzakonshme, ai duhet të ofrojë arsyeshmërinë dhe sqarime për këtë, në pajtim me këtë rregull. Tarifa e rregulluar me pakicë nuk do të përshtatet derisa Rregullatori do ta aprovojë një propozim.
- 11 FSHU mund të apelojë apo kontestojë çdo vendim të Rregullatorit në pajtim me legjislacionin e aplikueshëm.

- 1 Ngjarje e jashtëzakonshme do të konsiderohet të jetë:
 - 1.1 Ndryshimi në shkallën tatimore të aplikueshme për FSHU-në që nuk do të mbulohet tërësisht përmes përshtatjeve vjetore;
 - 1.2 Çfarëdo ngjarje e forcës madhore (force majeure), e përkufizuar në Shtojcën 7;
 - 1.3 Çfarëdo ngjarje tjetër që përmbush të gjitha kushtet në vijim:
 - (i) Nuk ka qenë nën kontrollin e FSHU-së;
 - (ii) Nuk do të mbulohet tërësisht përmes përshtatjeve vjetore; dhe
 - (iii) Do t'i ndryshojë në masë të konsiderueshme të hyrat dhe/ose kostot e FSHU-së gjatë një periudhe 12-mujore, në atë masë që mund të vlerësohet e arsyeshme se mund të tejkalohet pragu i materialitetit (e sqaruar në Shtojcën 5).
- 2 Ndodhja e ngjarjes së jashtëzakonshme është e mjaftueshme për të shkaktuar shqyrtimin e jashtëzakonshëm por, siç sqarohet në Shtojcën 5, ajo ngjarje duhet ta tejkalojë pragun e materialitetit në mënyrë që të përshtaten të hyrat e rregulluara të shërbimit universal dhe tarifa e rregulluar me pakicë.

SHTOJCA 6

NGJARJET E FORCËS MADHORE

Forcë madhore - është një akt ose ngjarje natyrore apo shoqërore, si tërmetet, rrufetë, ciklonet, përmytjet, shpërthimet vullkanike, zjarret ose luftërat, konfliktet e armatosura, kryengritjet, veprime terroriste ose ushtarake, të cilat pengojnë të licencuarin të përmbushë detyrimet e tij sipas licencës, si dhe akte apo ngjarje të tjera që janë përtej kontrollit të arsyeshëm dhe që nuk kanë ardhur për faj të të licencuarit dhe i licencuari nuk ka pasur mundësi të shmangë një akt ose ngjarje të tillë nëpërmjet ushtrimit të vullnetit, përpjekjeve, aftësive dhe kujdesit të tij të arsyeshëm